

**TEZAUUR LITURGIC**  
**21 DECEMBRIE**

**ACATISTUL**  
**SF. CUVIOS**  
**PROCOPIE**  
**DE LA VIATSK**



**MOSCOVA, 2000**



# **Акафист святому блаженному Прокопию, Христа ради юродивому, Вятскому чудотворцу**

## **Кондак 1**

Избранному чудотворцу, дивному предстателю пред Богом, блаженному Прокопию, пресветлому светильнику страны Вятския, многими чудотвореньми утешающему с верою чтущих святую память его, умильно взываем: Радуйся, блаженне Прокопие, скорый помощниче, Вятский чудотворче.

## **Икос 1**

Ангела на земли яви тя милосердный Творец Небеси и земли: вся бо земная во уметы вменил еси, блаженне Прокопие, да Христа приобрящещи. Темже вси многотрудное житие и блаженную кончину твою зряще, радостно тебе вопием:

Радуйся, издетства в жилище Духа Святаго чистое и непорочное предуготованный.

Радуйся, от лютаго недуга чудесне исцеленный.

Радуйся, на подвиг юродства, Христа ради, свыше призванный.

Радуйся, от преподобнаго Трифона на путь спасения наставленный и благословенный.

Радуйся, благодати сосуде избранный.  
Радуйся, благословение преподобнаго Трифона,  
яко легкое иго Христово понесый.  
Радуйся, блаженне Прокопие, скорый  
помощниче, Вятский чудотворче.

### **Кондак 2**

Видя тя Господь угодна Себе быти, блаженне  
Прокопие, егда млад сый громом поражен  
бысть, по слезней же молитве родителей твоих к  
Богу, исцеле. Все же людие, окрест живущии, со  
страхом и удивлением вопияху Богу: Аллилуиа.

### **Икос 2**

От юности подвиг юродства стяжевая, сердце к  
небесней чистоте устремил еси, блаженне  
Прокопие, сего ради вопием ти:  
Радуйся, родителей твоих похвало и украшение.  
Радуйся, труды их молитвою выну услаждавый.  
Радуйся, к деланию духовному предуказанный.  
Радуйся, послушания сыновняго наставниче.  
Радуйся, молитв ради родителей, от недуга  
тяжкаго Господем исцеленный.  
Радуйся, молитвами преподобнаго Трифона от  
всякаго страхования прият исцеления.  
Радуйся, блаженне Прокопие, скорый  
помощниче, Вятский чудотворче.

### **Кондак 3**

Сушу бо ти недужну, блаженне Прокопие, родителие принесоша тя во град Хлынов во обитель Пресвятыя Богородицы к преподобному Трифону. Силою молитв его от лютыя смерти избавлен бысть, поя Богу: Аллилуиа.

### **Икос 3**

Имеяй богатство милосердия неизреченное, скоро руку помощи своя простре ти Господь, блаженне Прокопие: зане с верою к Тому притекл еси, на Него Единого все упование свое возложив. Темже мы, видяще веру твою и дивное ея оправдание, умиленно вопием ти:

Радуйся, по исцелении от недуга единому Богу поработати возжелавый.

Радуйся, любви ради Божией, дом отеческий оставивый.

Радуйся, во одежде убозей странника во град Слободский, душевнаго ради спасения, пришедый.

Радуйся, в храме великомученицы Екатерины, верно и усердно служивый.

Радуйся, у пресвитера Илариона приют телеси своему обретый.

Радуйся, к пресвитеру оному всецело в послушание предавыйся.

Радуйся, блаженне Прокопие, скорый помощниче, Вятский чудотворче.

## **Кондак 4**

Бури многих бед и соблазнов житейских в мире сем бегая, тайно от дома отеческаго ушед, и жестокому пути спасения юродству, Христа ради, умыслил еси подражати поя Богу: Аллилуиа.

## **Икос 4**

Провидя преподобный Трифон, благодати сосуд избранный явится стране Вятской, благослови ты на подвиг юродства. Мы же, проразумение того сбывшееся зряще, вопием ти, блаженне Прокопие:

Радуйся, в Дом Пресвятыя Богородицы на спасение от родителей принесенный.

Радуйся, от преподобнаго Трифона любезне приятый.

Радуйся, отечествие свое ради пользы душевныя оставивый.

Радуйся, труды ко трудом, посты ко постом прилагавый.

Радуйся, с усердием и любовью к Дому Божию во граде Слободстем Богови работаваый.

Радуйся, добрый подвижниче благочестия в стране Вятской.

Радуйся, блаженне Прокопие, скорый помощниче, Вятский чудотворче.

## **Кондак 5**

Боготечную Кровь Христа за ны пролиянную  
духовныма очима выну созерцая, блаженне  
Прокопие, прилепился еси совершенною к Тому  
любовию. Темже преселился еси из града  
Слободскаго во град Хлынов, да славы людския  
убежав, поеши Христу Богу: Аллилуиа.

## **Икос 5**

Врагу, присно на подвижники ополчающуся,  
жестоким житием противустал еси, блаженне  
Прокопие, плоть духови твоему поработив  
воздержанием. Темже мы, подвигом твоим  
чудящися, зовем ти:

Радуйся, во град Хлынов удаливыйся славы и  
молвы людския уклоняся.

Радуйся, безплотному ангелу житием zde  
уподобивыйся.

Радуйся, ту ветхаго человека в себе умертвивый,  
смирено досаждения от людей безумных  
терпя.

Радуйся, хлад страны Вятския не превозможе  
пламенныя веры твоея.

Радуйся, днем на на торжищих и стогнах людей  
града Хлынова обличаяй и на путь спасения  
направляяй.

Радуйся, ноци в пламенной молитве к Богу в  
притворах храмов пребываяй.

Радуйся, блаженне Прокопие, скорый помощниче, Вятский чудотворче.

### **Кондак 6**

Проповедует подвиги твоя, блаженне Прокопие, страна Вятская многотрудному житию твоему чудящися. Воздвиже бо на тя брань лютую враг спасения нашего: ты же постом и молитвою таковая соодолел еси, благодарственне воспев Богу: Аллилуиа.

### **Икос 6**

Возсия благодать в подвиге многотруднаго жития твоего, блаженне Прокопие. Не точию бо на тя бывшая искушения мужественне отразил еси, но и всем во искушениях мудрый споборник являешися, да с радостию тебе вопием:

Радуйся, святаго ради жития от Бога зело возлюбленный.

Радуйся, безстрастия проявителю.

Радуйся, воздержания образе.

Радуйся, сластолюбцев посрамление.

Радуйся, в бедах и тесноте на Бога упователю.

Радуйся, в покров себе имевый пречудный омофор Приснодевы.

Радуйся, блаженне Прокопие, скорый помощниче, Вятский чудотворче.

## **Кондак 7**

Хотя Владыка Господь явити тя, блаженне Прокопие, мужа во всем совершенна, попусти врагу спасения нашего пакости ти делати. Ты же смирением искушения посрамив, победне воспел еси Богу: Аллилуиа.

## **Икос 7**

Новая купель Силоамская явися ти, блаженне, обитель Пресвятыя Богородицы, в ней же от болезни душевныя и телесныя исцелился еси, и яко муж в меру возраста Христова Богови предстал еси. Мы же вопием ти:

Радуйся, истиннаго трезвения учителю.

Радуйся, бодрственнаго к себе внимания стяжателю.

Радуйся, блаженных Прокопия и Иоанна Устюжских единокоравниче.

Радуйся, яко с теми Христу ныне молишися, да низложится сила диаволя.

Радуйся, еще в житии на земли яко чудотворец дивен явился еси.

Радуйся, Церкви Православныя славо и украшение.

Радуйся, блаженне Прокопие, скорый помощниче, Вятский чудотворче.

## **Кондак 8**

Странники сущыя на земли сей, враг присно искушает ны, и многи поставляет преграды, да не достигнем Отечества Небеснаго, но ты яко сокрушивый того ухищрения, помози нам, блаженне Прокопие. Дадесе бо ти благодать недуги целити, будущая провидети и выну быти со призывающими тя и верно поющими Богу: Аллилуиа.

## **Икос 8**

Все житие наше на земли, печали и скорби полно есть, искушения же и падения предлежит нам претерпети, но ты помози нам, блаженне Прокопие, да благодарственне зовем ти:  
Радуйся, помышления сердец провидевый.  
Радуйся, сердец скорбных уврачевателю.  
Радуйся, коегождо от мудрости жития твоего наставляял еси.  
Радуйся, нищ сый плотию, богатство многоценное дарований духовных имевый.  
Радуйся, аки крин благоуханный во граде Хлынове явивыйся.  
Радуйся, болярину Михаилу Татищеву скорое освобождение от темничных уз предуказавый.  
Радуйся, блаженне Прокопие, скорый помощниче, Вятский чудотворче.

## **Кондак 9**

Всею душею прилепивыйся Богови, славою земною не уязвился еси, блаженне Прокопие, дары и приношения, от людей даваемыя, со смирением принимал еси, ношаше на малое время, глаголя в себе, довлеет ми покрова неба и ложа земли. Темже и нас добродетели нестяжания научи, во еже чистыми усты и сердцем пети Богу: Аллилуиа.

## **Икос 9**

Вси людие града Хлынова высоту подвигов твоих всюду возвестиша, блаженне Прокопие. Мы же добродетели твоя воспевающе, в похвалу тебе сия вопием:

Радуйся, яко солнце пресветлое земли Вятской возсиявый.

Радуйся, в трудех многих покой телеси своему обретый.

Радуйся, подвиг свой усугубляя тайным доброделанием.

Радуйся, лютость людей неразумных града Хлынова благостию своею укротивый.

Радуйся, ведети грядущее от Владыки Христа сподобивыйся.

Радуйся, ангелом земным быти удостоенный.

Радуйся, блаженне Прокопие, скорый помощниче, Вятский чудотворче.

## **Кондак 10**

Спастися хотя и со Христом быти, о сем Господа молил еси, блаженне Прокопие. Человеколюбец же Господь приим моление твое, открь кончину твою и со избранными причастие поведати, с нимиже ныне воспеваеши Ему: Аллилуиа.

## **Икос 10**

Стена ти бысть крепка, блаженне Прокопие, Пресвятая Богородица, в Еяже обители прежде благословение от преподобнаго Трифона на подвиг юродства получил еси. Матерним Ея покровом осеняемь, течение жизни скончав на земли, небесную весть слышати сподобился еси.

Темже ныне радостно вопием ти:

Радуйся, в молитве скоро от Бога услышанный.

Радуйся, Пресвятою Богородицею соблюденный в подвиге юродства Христа ради.

Радуйся, благословение преподобнаго Трифона, яко путеводную звезду пред взором духовным имел еси.

Радуйся, наготу и лишения терпяше, даже до скончания жития своего.

Радуйся, от Бога извещенный о часе скончания твоего.

Радуйся, скорое сопричтение ко ангелом увидевый.

Радуйся, блаженне Прокопие, скорый помощниче, Вятский чудотворче.

## **Кондак 11**

Пение немолчное принесоша Богу людие града Хлынова, блаженне Прокопие, зряще блаженную кончину твою. Обретоша бо тогда лице твое, яко лице ангела, и свет от святаго телесе твоего исходящ, с благоговением воспеша Богу:  
Аллилуиа.

## **Икос 11**

Яко светоприемная свеща, благодатию Божиею возжженная, озарил еси, блаженне Прокопие, чудесы твоими страну Вятскую. Темже радостно вопием ти:

Радуйся, добрый воине, от Христа венцем славы украшенный.

Радуйся, благоухания дивнаго источниче.

Радуйся, пред кончиною своею за град Хлынов молитву к Богу вознесый.

Радуйся, за люди творящья ти досады и утеснения, яко за творящих добродетели Богу моливыйся.

Радуйся, тело свое к погребению на овразе засоре приготовивый.

Радуйся, дом Симеона Павлова принесением мощей своих благословивый.

Радуйся, блаженне Прокопие, скорый помощниче, Вятский чудотворче.

## **Кондак 12**

Благодати великия носителя и будущего всех воскресения уверителя людем Вятским дароватя Господь, блаженне Прокопие. Все бо с верою к тебе притекающии, молитв исполнение и надежду общаго воскресения улучают, благодарственне поюще Богу: Аллилуиа.

## **Икос 12**

Поем твоя милости и чудеса, блаженне Прокопие: выну бо и по отшествии твоём с нами пребываеши, Христу за нас моляся. Темже от благодарных устен в похвалу тебе приносим сицевая:

Радуйся, молитвенниче наш усердный.

Радуйся, помощниче наш скорый.

Радуйся, от наваждения духов злобы спасающ.

Радуйся, вериги твоя, тобою носимыя, источник исцелений явишася.

Радуйся, всех недугов душевных и телесных врачу скорый.

Радуйся, о спасении всех христиан теплый молитвенниче.

Радуйся, блаженне Прокопие, скорый помощниче, Вятский чудотворче.

## **Кондак 13**

О блаженне Прокопие, скорый помощниче и Вятский чудотворче! Приими сие малое со

умилением приносимое тебе моление, и со Пресвятою Богородицею, и преподобным Трифоном, и всеми святыми молися Господу Иисусу Христу, да избавит нас от всяких бед и скорбей, от враг видимых и невидимых, от напрасныя смерти и будущих мук и сподобит нас со избранными своими воспевати Ему:

Аллилуиа.

Этот Кондак читается трижды, затем Икос 1-й и Кондак 1-й



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НУЖЕ  
НЕБО**